

UNIVERZITET U TUZLI  
SENAT  
Broj: 03-6056-1/14  
Tuzla, 02.10.2014. godine

Na osnovu člana 59. stav (1) tačka a) i stava (2) istog člana Zakona o visokom obrazovanju („Službene novine TK“ broj 8/08, 11/09, 12/09, 13/12, 16/13, 7/14 i 8/14) i člana 74. stav (1) tačka 1) i 9) Statuta Univerziteta u Tuzli (Drugi prečišćeni tekst), na prijedlog Rektora Univerziteta u Tuzli, Senat Univerziteta na sjednici održanoj 02.10.2014. godine donio je

## **ODLUKU**

### **o primjeni načela politike osiguranja kvaliteta nastave i mjere za njeno efikasno i zakonito obavljanje na Univerzitetu u Tuzli u akademskoj 2014/15. godini**

#### **OPŠTE ODREDBE**

##### **Član 1.**

Univerzitet u Tuzli je ustanova visokog obrazovanja Tuzlanskog kantona od posebnog društvenog značaja za Tuzlanski kanton i BiH.

Univerzitet kao visokoškolska ustanova koja se bavi i nastavnim i naučno - istraživačkim radom, koja nudi akademske stepene sva tri ciklusa, sa ciljevima koji uključuju unapređenje znanja, misli i školstva u TK i BiH, obrazovni, kulturni, društveni i ekonomski razvoj TK i BiH, promociju demokratskog građanskog društva i postizanje najviših standarda nastave i visokog obrazovanja.

Vlada Tuzlanskog kantona donijela je 2006. godine Standarde visokog obrazovanja i normative Tuzlanskog kantona te izmjene i dopune 2008. godine samo za Prvi ciklus studija. Vlada TK nije blagovremeno donijela nove Standarde visokog obrazovanja i normative prilagođene i primjenjive za sva tri ciklusa studija na Univerzitetu, niti pojedinačne Standarde za Drugi, odnosno za Treći ciklus studija.

Na Univerzitetu u Tuzli (u daljem tekstu Univerzitet) je istovremeno ograničeno zapošljavanje nedostajućeg broja nastavnika od 2006. godine. U akademskoj 2013/14. godini nedostajalo je oko 77 nastavnika na Prvom ciklusu i oko 80 nastavnika na Drugom i Trećem ciklusu studija.

#### **NAČELA POLITIKE OSIGURANJA KVALITETA NASTAVE**

##### **Član 2.**

Polazeći od činjenica da Univerzitet kao javna visokoškolska ustanova ima zakonsku obavezu da ima organiziranu nastavu na sva tri ciklusa studija, da je BiH u ozbiljnoj ekonomskoj krizi, da je visok deficit budžeta TK, da Vlada TK u ime osnivača nije obezbijedila niti pravne niti materijalno finansijske uslove za kvalitetno i zakonito odvijanje nastave ni za jedan ciklus studija, Senat Univerziteta u Tuzli utvrdio je privremenu mjeru: „Načela politike osiguranja kvaliteta nastave i mjere za njeno efikasno i zakonito obavljanje na Univerzitetu u Tuzli u akademskoj 2014/15. godini“, kako slijedi:

1. Na Prvom ciklusu studija - dodiplomskom studiju, nastavnik može biti opterećen satima predavanja preko Standardima sedmično utvrđene nastavne norme do 50%, odnosno do dva i po, odnosno tri sata predavanja.
2. Nastavnik može preći opterećenje utvrđeno u prethodnoj tački (tačka 1) samo na jednom nastavnom predmetu koji mu ulazi u Standardima utvrđeno sedmično opterećenje ukoliko prethodno potpiše izjavu da za taj dio predavanja neće tražiti novčanu nadoknadu.
3. Sati predavanja na dodiplomskom studiju preko sedmično utvrđene nastavne norme plaćaju se u iznosu i na način propisan Pravilnikom o plaćama, naknadama i drugim primanjima zaposlenika Univerziteta u Tuzli (Prečišćeni tekst).
4. Nastavnik koji nema punu sedmičnu normu sati predavanja utvrđenu Standardima može istu dopuniti držanjem vježbi, s tim da su dva sata vježbi ekvivalentna jednom satu predavanja.
5. Drugi ciklus studija, master studij, studenti sami finansiraju.
6. Pravilnik o prihodima i rashodima drugog ciklusa studija – master/magistarski studij na fakultetima/Akademiji Univerziteta u Tuzli, donosi Upravni odbor na prijedlog Senata, najkasnije do kraja oktobra s tim da se prijedlog Pravilnika podnese najkasnije do 20. oktobra 2014. godine.
7. Dvije ili više organizacionih jedinica mogu organizirati zajednički master studij.
8. Nastava drugog ciklusa studija se realizira izvan 40-satne radne sedmice.
9. Nastava na Trećem ciklusu studija - doktorskom studiju je autorsko djelo.
10. Doktorski studij, studenti sami finansiraju.
11. Pravilnik o prihodima i rashodima trećeg ciklusa studija – doktorski studij na fakultetima/Akademiji Univerziteta u Tuzli, donosi Upravni odbor na prijedlog Senata, najkasnije do kraja oktobra s tim da se prijedlog Pravilnika podnese najkasnije do 20. oktobra 2014. godine.
12. Doktorski studij akademske 2014/2015. godine organizira se na fakultetima/studijskim programima/odsjecima na kojima doktorski studij nije do sada organiziran.

## **ZAVRŠNE ODREDBE**

### Član 3.

Ova Odluka stupa na snagu danom donošenja, a primjenjivat će se u akademskoj 2014/15. godini.

DOSTAVITI:

1x Vlada TK

1x Ministarstvo obrazovanja, nauke, kulture i sportaTK

1x Upravni odbor Univerziteta u Tuzli

1x Fakulteti/Akademija

1x Unija studenata

1x Ured za nastavu i studentska pitanja

1x Ekonomsko-finansijska služba

1x Služba za pravne, kadrovske i opšte poslove

1x Senat

**PREDSJEDNIK SENATA**

**Dr. sc. Enver Halilović, redovni profesor**